

四庫全書

集部

欽定四庫全書

集部

甫田集卷二

詳校官給事中臣王鍾健

中書<sub>臣</sub>劉源溥覆勘

總校官檢討<sub>臣</sub>何思鈞

校對官學正<sub>臣</sub>湯垣

謄錄監生<sub>臣</sub>董邦本

欽定四庫全書

集部六

甫田集

別集類五明

提要

臣等謹案甫田集三十五卷附錄一卷明文徵明撰徵明初名璧以字行更字徵仲號衡山長洲人以歲貢薦授翰林院待詔事迹具明史文苑傳是集凡詩十五卷文二十卷附錄行畧一卷其仲子嘉所述也徵明與沈周

皆以書畫名亦並能詩揮灑淋漓但自寫其  
天趣如雲容水態不可限以方圓徵明詩則  
雅飭之中時饒逸韻靜志居詩話記其告何  
良俊之言曰我少年學詩從陸放翁入故格  
調卑弱不若諸君皆唐音也此所謂如魚飲  
水冷暖自知皎然不誣其本志然周天懷坦  
易其畫雄深而蒼莽詩格如之徵明秉志雅  
潔其畫細潤而瀟灑詩格亦如之要亦各肖

其性情不盡由於所倣效也朱彞尊明詩綜  
錄徵明詩十五首其池上一首得諸墨迹為  
本集所不載且稱其集外流傳者甚多惜無  
廣搜為續集者然縑素流傳半真半贋與其  
如吳鎮倪瓚諸集多收偽本固不如據其家  
集猶不失本來面目矣乾隆四十四年七月  
恭校上

總纂官

臣

紀昀

臣

陸錫熊

臣

孫士毅

總校官臣陸費輝

欽定四庫全書

甫田集卷一

明文徵明撰

詩八十首 附錄四首

秋夜

忽忽故園夢悠悠淞上城一夜耳不息水邊踈柳聲開  
門月如畫十里秋盈盈中心亂無執散上岡頭行吳山  
望不除眼角柔雲生男兒志遺世物故難為情

故園

屋舍小山村終然思故園雨晴秋倚閣月出夜開門好  
景亦時改遠人空目存梅花未消息行矣晚何言

有懷劉協中

東風度幽館羣鳥相和鳴念子會無期茫然過清明春  
江芳草遠懷人心目驚如何多朋友我獨傍山城豈無  
樽酒歡亦有花木榮所憐異鄉物徒念心忤營白雲度  
水去日暮山縱橫倚闌詠修竹千里何當并



荅唐子畏夢余見寄之作

故人別後千回夢想見詩中語笑譁自是多情能記憶  
春來何止到君家

行色

秋山馬前空復橫馬蹄不作看山行悠然回首何處所  
此心已到他州城火燈匆匆鷄一聲貴賤富貧俱有程  
相看一語出不得細雨欲落空江明

東葛城夜發

蕭蕭東葛路馬上聽嚴更月出高山黑天空遠水明年  
光秋漸索客子夜猶行村落知何處時聞犬吠聲

至定山辱莊先生贈詩次韻奉荅

穉齒窮身豈有知偶陪高論得移時感公不以愚頑棄  
顧我何堪遠大期草閣便須終歲住僕人休訝出山遲  
歸來乞得堯夫句暮雨秋燈不斷思

定山莊先生贈詩附

一燈何處寫相知對坐寒窓暮雨時詩本平生非杜甫

琴才臨老遇鍾期儘堪出手名家早但覺忘年得友  
遲儻許無言真妙意欲將千載慰相思

不寐

孤坐忽不樂挑燈當我前素書橫几案欲讀已茫然當  
年念有負誓志軼前賢富貴亦何物未老已自憐嗟哉  
昔惡聞零落今同焉

大雪不出偶成八韻自齋中所見外皆禁不犯  
靜坐朝慵出不知風雪臨凝暉上窓紙積冷到衣衾小

金史四庫全書  
卷一  
片投牆隙餘威結研心聆音琤可喜想像浩難禁童子  
傳來看家人報說深卷書空自照杯酒不辭斟意賞何  
煩對傳聞不害吟未應閉戶臥不及放舟尋

簡子畏

落魄迂疎不事家郎君性氣屬豪華高樓大叫秋觴月  
深慳微酣夜擁花坐令端人疑阮籍未宜文士目劉叉  
只應郡郭聲名在門外時停長者車

甲寅除夜雜書

千門萬戶易桃符東舍西鄰送歷書二十五年如水去  
人生消得幾番除

多事關心偶不眠隨人也當守殘年不須更說新春事  
來歲今宵在目前

人家除夕正忙時我自挑燈揀舊詩莫笑書生太迂闊  
一年功課是文詞

小童篝火潔門閭為說今年忌掃除却有窮愁與多病  
無因歲晚一般驅

金定四庫全書  
卷一  
遙夜遲遲燭有花  
家人懽笑說年華  
人生勿苦求身外  
常得團圓有樂家

崇義院雜題

小院風清橘吐花  
牆陰微轉日斜斜  
午眠新覺書無味  
閒倚闌干嗽苦茶

縹緲游絲墮不收  
悠然庭砌綠陰稠  
院涼僧少音聲絕  
時聽敲門亦自幽

六月門前暑似炊  
殿堂深處未曾知  
晚涼浴罷思歸去

更為松風佇少時

殿閣微涼吹葛衣  
檻前梅子雨霏霏  
清談時有閒僧對  
手擘棊櫚當麈揮

白日悠悠抵歲遥  
困來書卷暫相拋  
馬蹄不到松陰下  
手弄殘棋獨自敲

茗碗壺薰意有餘  
日長人散閉精廬  
俄然屋角涼風順  
吹起新蟬亂讀書

繞寺松杉近百栽  
孤花明透綠叢開  
晚涼却扇池邊立

弱弱餘芬度水來

髣几新揩滑欲流時時弄筆小窓幽自憐多好還成累  
揮汗為人寫扇頭

修廊如洗斷塵囂白粉牆圍碧瓦索擁鼻徐行成獨詠  
晚風吹亂石芭蕉

飲子畏小樓

今日解馳逐投閒傍高廬君家在臯橋諠闐井市區何  
以掩市聲充樓古今書左陳四五冊右傾三兩壺我飲



良有限伴子聊相娛與子故深密奔忙坐閣踈旬月一  
會面意勤情有餘蒼煙薄城首振袖復躊躇

余畫金焦落照圖吳水部德徵先生寄詩二首

題謝長句

憶昨浮船下揚子平翻渺渺波千里何來雙島挾飛樓  
璀璨彤煌截濤起夕峯倒墮滿江陰霜樹高浮半空紫  
舟人指點落日處凌亂煙光射金綺平生快覩無此奇  
却恨歸帆北風駛至今偉蹟在胷中回首登臨心不已

偶然興落尺紙間便欲平吞大江水固知心手不相能  
塗抹聊當臥遊爾情窓舒卷日數回不敢示人聊自喜  
水部先生詩有名忽寄瑤篇重稱美漫云家法自湖州  
自媿區區何足齒由來題品係名聲何況先生是詩史  
君不見當年畫馬曹將軍附名甫集猶不死又不見閻  
公有謂起文儒池上俄蒙畫師耻人生固有幸不幸拙  
劣何堪古人擬江山千載等陳迹一笑寧須論非是

水部二詩附

戲拈秃筆寫金焦萬里青天見玉標  
未用按圖神已往耳邊似接海門潮

閒寫金焦鎮海門夕陽孤鶩淡江痕  
一枝畫筆承傳久須信先生老可孫

乙卯除夕

糕果登盤酒薦椒咲歌聊用永今宵  
老親自喜還家健幼女仍誇學語嬌  
終歲悲歡言莫盡一燈團聚福難消  
桃符日歷年年好不謂青春却暗凋

暮春

高榆風定翠相圍  
天氣悠揚思轉微  
畫閣凝香新試扇  
春肌生汗欲更衣  
乍聞幽鳥渾無見  
時墮游絲忽漫飛  
惆悵東園尋曉夢  
落花芳草已都非

靈巖山絕頂望太湖

靈巖山正當胥口  
落日西南望太湖  
雙島如螺浮欲吐  
片帆和鳥去俱無  
閒論往事何能說  
不見高人試一呼  
慎勿近前波浪恐  
大都奇絕在模糊

讀于肅愍旌功錄有感

南遷議起共倉皇一疏支傾萬弩強旣以安危繫天下  
曾無羽翼悟君王莫嫌久假非真有祇覺中興未耿光  
淺薄晚生何敢異百年公論自難忘

老臣自處危疑地天下遑遑尚握兵千載計功真足掩

一時起事豈無名

當時欲赦于王或謂不殺二人則今日之事為無名然則復辟之事豈無

名未論時宰能生殺須信天王自聖明地下有知應不

恨萬人爭看墓門旌

因讀旌功錄有感徐武功事

固鎖高垣事可吁更憑何罪易皇儲諸公方有同謀懼  
識者能無意外虞機會如斯何可失功名之際本難居  
冤哉一掬江湖血信史他年未必書

冬夜讀書

故書不厭百回讀病後惟應此味長千古精神如對越  
一燈風雨正相忘卷中求道深知謬意外圖名抑又荒  
束髮心情誰會得中宵撫几自茫茫

寂夜一首效子建

中宵聞零雨撫枕起蹢躅昏釭栖素壁流燭照重幃感  
此寂無語戚然興我思我思何鬱伊欲舉琴如絲少壯  
不待老功名湏及時男兒不伏劍亦湏建雲旗三十尚  
隨人奚以操筆為文章可腴道曾不療寒饑仰屋愧浮  
塵俯睽影依依人生良有命何獨令心悲心悲髮為白  
失脚令身危欲為絕世行道遠恐不支世情忌檢飭歛  
目俟其疲誰能七尺身受此千變機役役亦徒爾多憂

得無癡惟應慎厥躬古人以為期

春閨

綠陰生寂晝遲遲薄汗沾裳氣力微起傍曲闌垂手立  
清風細細落薔薇

兒子晬日口占二絕句

堂前笑展晬盤時漫說終身視一持我已蹉跎無復望  
試陳書卷卜吾兒

吾家積德亦云稠不易生兒到歲周印綬干戈非敢冀



百年聊欲紹箕裘

秋夜不寐有懷錢二孔周

客散西堂夜悄然  
修筠涼吹供清眠  
踈螢紈扇秋無賴  
淺水紅蕖月可憐  
侍女銀杯搖雪乳  
誰家玉笛唱嬋娟  
意中憶得城東闕  
孤鶴翩翩骨有仙

前年

前年伴嫁南鄰妹  
今歲仍陪北舍姨  
老我無媒心獨苦  
閉門好畫入時眉

詠堯民案上盆蘭

崇蘭移自荆溪上  
小盞春深自着花  
賓客清閒塵土遠  
曉窓親沃案頭茶

渺渺微風約珮環  
楚江清落研屏間  
美人不見瑤琴歇  
一卷離騷對揜關

詠文信國事四首

地轉天旋事不同  
老臣臨市自從容  
誓將西嶺填東海  
忍着南冠向北風  
千里勤王空赴義  
百年養士獨收功

人間別有成仁樂未用區區悼此公

倉卒勤王萬里身風塵顛倒作累臣三綱已去嗟何補  
一死臨期認自真直以安危繫天下未宜成敗論斯人  
遺文尚可誅姦賊何但悲辛泣鬼神

國勢已離天命去孤臣狼狽阻殘兵分當如此餘非計  
事訖無成死有名平日公卿咸肉食千年忠義屬書生  
天心悔禍寧無日惜不令公見肅清

南北間關百戰餘此身宗社許馳驅可憐功業惟詩在

自決存亡與國俱強敵至殘猶歎服皇天無意竟何如  
平生心事堪誰訴漫托他年半紙書

枕上聞雨有懷宜興杭道卿

時道卿客唐  
子畏西樓

三更風雨鬧虛簷燈燭寥寥抱枕眠應有旅遊人不寐  
淒涼莫到小樓前

厓山大忠祠

鼎湖龍遠野雲陰慷慨中流誓國心臣力不支香氣竭  
忠魂有限海波深百年仁義空漸盡此日神州遂陸沉

峻節竒功磨不得崖山突兀自千尋

皇天不祐宰臣謀萬里樓船一浪休飄蕩已知吾事去  
覆亡安用此身浮祇今潮自如期至終古江應不盡流  
折戟併銷塵海換行人猶自說礪州

頻年航海欲何為天厭中原遂不支滿地江湖無死所  
際天風浪有平時倉皇一念聊臣分寂寞中流賴史知  
回首又看強敵滅寒潮自繞大忠祠

千載英雄餘恨在怒濤驚浪日撻撞有天肯與仇同戴

無面能看主再降烈士深悲甘蹈海中原不復竟如江  
君王莫罪風波惡應是憐人解覆邦

追和倪元鎮先生江南春

象牀凝寒照藍筍碧幌蘭溫瑤鴨靜東風吹夢曉無蹤  
起來自覓驚鴻影彤簾霏霏宿餘冷日出鶯花春萬井  
莫怪啼痕栖素中明朝紅媽鑒作塵春日遲遲春波急  
曉紅啼春香霧濕青華一失不再及飛絲縈空眼花碧  
樓前柳色迷城邑柳外東風馬嘶立水中荇帶牽柔萍

人生多情亦多營

雪後

寒日晶晶曉溜聲中庭快雪一宵晴  
牆西老樹太骨立窓裏幽人殊眼明  
想見漁蓑無限好怪來詩思不勝清  
江南殘臘相將盡會看門前春水生

與邢麗文登葑門城樓

天風異制木蛇空雉堞差差夕照中  
百里山川形勝舊萬家煙火歲年豐  
迤南茂苑迷陳迹直北荒原識故宮

會取千年興廢理與君極目送飛鴻

夜坐聞雨有懷子畏次韻奉簡

皋橋南畔唐居士一榻秋風擁病眠用世已銷橫槩氣  
謀身未辦買山錢鏡中顧影驚空舞檻下長鳴驥自憐  
正是憶君無奈冷蕭然寒雨落窓前

歲暮齋居即事

簷樹扶疎帶亂鴉蕭齋只似野人家紙窓獵獵風生竹  
土盎浮浮火宿茶日色射雲時弄彩雨絲吹雪不成花



庭中卉物凋零盡獨有蒼松領歲華

陋巷蕭條少過從  
燕閒真味泊然空  
荒鷄寂晝深庭院  
寒雀西風小樹聚  
撫事蹉跎歲云暮  
懷人牢落雨其濛  
鑪香欲歇茶杯覆  
詠得梅花苦未工

過吉祥寺追和故友劉協中遺詩

殿堂深寂竹林閒  
坐戀樓陰忘卻還  
水竹悠然有遐想  
會心何必在空山

塵蹤俗面強追閒  
慚愧空門數往還  
不見故人空約在

金史四  
卷一  
黃梅雨暗郭西山

協中詩附

城裏幽棲古寺閒相依半日便思還  
汗衣未了奔馳  
債便是逢僧怕問山

景德寺

古屋無人犬護籬偶拋塵土得幽棲  
不知何福能消受  
滿地松陰一鳥啼

次韻題子畏所畫黃茆小景

斜日翻波山倒浸晚晴幻出西南勝絕島雙螺樹色浮  
遙天一線鷗飛刺誰剪吳淞尺紙間唐君曾有洞庭山  
古藤危磴黃茆渚細草荒宮消夏灣我生無緣空夢墮  
三十年來蟻旋磨睡起窻前展畫看恍然垂手磯頭坐  
湖山宜雨亦宜晴春色龍蔥秋月明知君作畫不是畫  
分明詩境但無聲古稱詩畫無彼此以口傳心還應指  
從君欲下一轉語何人會吸西江水

吳隱之畫像

貪廉自我非泉致刺史詩篇萬古新展卷蕭然袍笏在  
世間多少負慚人

十年遺像識真難重是高風不可刊一樣廣州俱刺史  
幾人傳入畫圖看

暮春齋居即事

經旬寡人事蹤跡小窻前暝色連殘雨春寒宿野煙茗  
杯眠起味書卷靜中緣零落梅花瘦風吹更可憐

閒庭青草積春半思蒼茫小雨作寒食微風汎海棠芳

情經病減白日廢書長何物供歌枕紫簾一炷香

畫鵲

日光浮喜動簷楹鳥鵲於人亦有情  
小雨初收風潑潑亂飛叢竹送歡聲

畫烏

城頭霜落月離離  
匝樹羣烏欲定時  
會有人占丈人屋  
微風莫自裊空枝

與達甫燕坐小齋為寫竹石

對坐焚香習燕清好風如水汎簾旌夕陽忽見疎疎影  
落木空江生遠情

秋夜懷昌國

初秋雨時霽夕景歛炎疴躡屐遵廣除矯首睇明河白  
露浣衣帶商飈振庭柯縞月升雲闕照我東牆阿故人  
不得將良夜空婆娑非無一樽酒顧影當奈何

陰蟲抱莎啼秋風在庭戶微涼逗短葛月出照團露驚  
禽飛漠漠顧見庭中樹柔枝日以疎安得共遲暮人生

豈獨堅坐閱衡杓度憂來搔短髮衰薄已堪數

除夕

梅花欲動意婆娑雪霰侵陵奈歲何呵凍笑供春帖子  
殘年清債已無多

辟瘟細細熟靈丹坐倚寒檠向夜闌臘意亦知人戀歲  
為留殘雪隔年看

題王侍御敬止所藏仲穆馬圖

聲聲才情與世疎等閒零落傍江湖不應泛駕終難用

閒看王孫駿馬圖

洞庭東山詩七首

太湖

沙渚依依雲不動風煙漠漠鳥飛回  
橫空暝色翻波去絕島秋聲繞樹來  
今古奔騰疑地盡東南偉麗自天開  
眼中浩蕩扁舟在欲喚鴟夷酹一杯

百街嶺

遙街百磴轉欽寄落日扶輿下嶺遲  
與樹蔽虧湖冉冉



因山高下屋纍纍儉勤成俗從知富靈秀鍾人信有奇  
十載一行殊恨晚分金不見橘黃時

宿靜觀樓

守谿先生作記

抱被何緣三宿戀燒燈一笑兩人俱秋山破夢風生樹  
夜水明樓月在湖盡占物華知地勝時聞人語覺村孤  
不煩詩句追清賞太史楮間記是闕

游能仁彌勒

鬱然臺殿鎖芙蓉見客山僧自打鐘小檻浮空秋水閣

虛庭隨影夕陽松  
泗州名在池無塔

寺有泗州池能照僧伽塔今廢飯

石師歸寺有峯

飯石禪師嘗住此寺有飯石峯

欲掃南牆留半偈  
白雲

回首媿塵蹤

### 宿靈源寺

夜隨鐘梵入靈源  
一笑虛堂解帶眠  
旋接僧談多舊識

偶依禪榻豈前緣  
離離松檜搖山月  
兀兀樓臺宿暝煙

塵句何年傳到此

壁間有餘詩

篝燈試讀已茫然

### 翠峯寺

雪竇禪師道場中有降龍井悟道泉

空翠夾輿松十里斷碑橫路寺千年遺蹤見說降龍井  
裏茗來嘗悟道泉伏臘滿山收橘柚蒲團倚戶泊雲煙  
書生分願無過此悔不曾參雪竇禪

游洞庭將歸再賦

城中遙指一螺蒼到此依然自一鄉曉鼓隔溪漁作市  
魚舟至則鳴鼓聚人秋風吹枳橘連牆名山更倚湖增勝清賞剛  
臨月有光正爾會心空又去不如僧住竹間房

再和昌國游洞庭西山詩八首

自胥口入太湖

蒹葭繚繞帶胥塘  
百里沿洄笠澤長  
新水浮天舟浩蕩  
遠山沉日樹蒼涼  
風煙西去堪乘興  
鷄犬中流別有鄉  
詠得鱸肥人膾玉  
自敲漁榜答滄浪

縹緲峯

雜草遙遵鹿兔蹤  
飛嵐拂袖映疎松  
平湖萬頃玻璃色  
落日千尋縹緲峯  
煙樹吳都晴上掌  
秋風雲夢晚填胷  
無煩咋指傷韓愈  
儘有閒情在短筇

下縹緲峯小憩西湖寺

迴嶺懸藤稍倦攀  
稅鞍中路得禪關  
百年清淨山中債  
半日浮生竹院閒  
小雨磬聲延午夢  
方池雲影淡秋顏  
此行別有堪誇事  
得與高僧共往還

經桃花塢

塢名雖存已廢

夕陽下馬桃花塢  
不見桃花塢亦蓁  
溪壑春風空舊夢  
柴扉流水或秦人  
圖經可按桑田異  
詩客多情燕麥新  
不用苦辛仍買種  
梁園金谷總成塵

左神洞

裏梁懷炬探幽玄稍即唵呀復曠然蕩滴微聞頭上浪

光晶別有地中天千年何物扃丹刻

相傳有神禹丹書在洞

一勺

憐君負紫泉

內有紫泉飲之長生

莫嘆虛酬十年願祇應凡骨未

能仙

左神道中

玉虛靈府千年秘恣討知君眼境新平日登高推短賦  
西來濟勝有輕身湖山四面天開寺橘柚千家土著民

他日菟裘如有意願攜書冊作比鄰

謁毛公壇雨不果行

擬攀棲迹拜靈仙  
辛苦佳期一雨愆  
短策空多探古興  
方壇剛欠訪真緣  
興懷丹篆愁雲外  
敗意簷聲客枕前  
賴是勝情初未減  
錦囊添得卧遊篇

遊資慶寺

老衲深居湖上山  
松扉斜掩磬聲寒  
袈裟對客妨秋定  
蔬筍開厨破晚餐  
未愧逡巡留偈子  
自緣疎野戀蒲團

歸來煙月篇章富乞與幽人得細看

何蓑衣故跡

塵世神仙事渺茫綠蓑誰識老佯狂  
華夷日月尋常語  
掉首當年動帝王

福壽院殘碑

秋風塵劫草離離曾是前元福壽基  
願力未隨文字滅  
有人下馬讀殘碑

甫田集卷一



欽定四庫全書

甫田集卷二

明文徵明撰

詩七十一首

方方壺畫

煙沈密樹蒼山暝波捲長空白鳥迴  
細雨斜風蓑笠具  
釣船何事却歸來

新波獵獵弄風蒲雨後雲山半有無  
一段勝情誰領略

欲從畫裏喚方壺

書昌國憶母詩後

音容杳渺夢中塵游子空吟寸草春  
莫怪掩篇雙淚落就中吾是有心人

春草冥冥雨暗阡轉頭二十七更年  
平生自謂心如鐵腸斷徐卿泣母篇

和答石田先生落花十首

點徑沾籬已燦然飛簾撲面更翩聯  
紅吹晴雪風千片

錦蹙春雲浪一川老惜鬢飄禪榻畔醉看燕蹴舞筵前  
無情剛恨通宵雨斷送芳華又一年

零落佳人意暗傷為誰憔悴減容光將飛更舞迎風面  
已褪猶嬌洗雨妝芳草一年空路陌綠陰明日自池塘  
名園酒散春何處惟有歸來屐齒香

蜂撩褪粉偶粘衣春減都消一片飛蒂撓園風無那弱  
影搖庭日已全稀樽前漫有盈盈淚陌上空歌緩緩歸  
未便小齋渾寂寞綠陰幽草勝芳菲

悵人無奈曉風何逐水紛紛不戀柯  
春雨捲簾紅粉瘦  
夜涼踏影月明多  
章臺舊事愁邊路  
金縷新聲夢裏歌  
過眼莫言皆物幻  
別收功實在蠶窠

戰紅酣紫一春忙  
回首春歸屬渺茫  
竟為雨殘緣太冶  
未隨風盡有餘香  
美人睡起空攀樹  
蛺蝶飛來却過牆  
脉脉芳情天萬里  
夕陽應斷水邊腸

桃蹊李徑綠成叢  
春事飄零付落紅  
不恨佳人難再得  
緣知色相本來空  
舞筵意態飛飛燕  
禪榻情懷裊裊風

蝶使蜂媒都懶慢一番無味夕陽中

開喜穠纖落更幽樹頭何用勝溪頭有時細數坐來久  
盡日貪看忘却愁惹草縈沙風冉冉傷春恨別水悠悠  
不堪舊病仍中酒踈雨濃煙鎖畫樓

風裊殘枝已不任那堪萬點更愁人清溪浣恨難成錦  
紅雨麝香併作塵明月黃昏何處怨游絲白日靜中春  
急須辦取東欄醉倒地猶堪藉綺茵

飛如有戀墮無聲曲砌斜臺看得盈細草栖霞朱點染

晴絲撩片玉輕明江風飄泊明妃淚綠葉差池杜牧情  
賴是主人能愛惜不曾緣客掃柴荆

情知芳事去還來眼底飄飄自可哀春漲平添棄脂水  
曉寒思築避風臺沾衣成陣看非雨點徑能勻襯有苔  
穠綠已無藏艷處笑他蜂蝶尚徘徊

王婆墩次楊儀部韻

遙看塢一聚到只屋三間姬姓隨墩在僧廊得蘚殷秋  
濃山照閣雨足水侵關依舊刺船去回瞻樹杪欄

江船對月效樂天何處難忘酒

何處難忘酒江船對月時風聲傳笑語波影散須眉遠  
火山浮動明河天倒垂此時無一觥水月負佳期

金山寺待月

浮玉山前玉露涼晚潮微上月洋洋魚龍深夜浮光怪  
雲樹遙空帶渺茫水國題詩酬一宿中泠裹茗薦初嘗  
江風吹酒不能睡起踏松陰自繞廊

金陵客樓與陳淳夜話

卷書零亂筆縱橫對坐寒窓夜二更奕世通家叨父行  
十年知己愧門生高樓酒醉燈前雨孤榻秋深病裏情  
最是世心忘不得滿頭塵土說功名

九月二十八夜夢中作

碧桐已蕭蕭水谷流決決獨行蒼莽間犬吠人跡絕旭  
日穿樹林青煙忽消滅時看殿簷風吹落松上雪

題養逸圖

書卷茶鑪百慮融夢回午枕竹窓風忙身見畫剛生媿



安得身閒似畫中

榮貴匆匆僅目前  
靜中光景日如年  
荊州運甕成何事  
不博柴桑一醉眠

立春日病起

青絲裹餅薦春盤  
喜見鞭春在臘前  
便與一冬除舊病  
尚餘七日是殘年  
梅花消息嚴寒後  
綵勝情懷薄酒邊  
旋取物華供帖子  
暖痕浮綠草生煙

元日書事效劉後村

愁早無端到小齋問愁誰送與誰媒殘年原未將愁去  
不是新年別帶來

不求見面惟通謁名刺朝來滿敝廬我亦隨人投數紙  
世情嫌簡不嫌虛

人日停雲館小集

新年便覺景光遲猶有餘寒宿敝帷寂寞一杯人日雨  
風流千載草堂詩花枝未動臨佳節菜飯相淹亦勝期  
春色到今深幾許小山南畔草痕知

春日閒詠

時節燒燈近，羈窮獨臥家。  
餘寒挾纊殘，困晚煎茶土。  
潤先滋草梅，晴薄試花新。  
年眠食好，隨分足生涯。

答彭寅之見贈

寅之與余同筆硯，交游最舊辱詩有相如之  
句，推予過矣。

弱冠追隨漸老成，中間多故各深更。  
扁舟憔悴橫江夢，短榻淹留共硯情。  
論學平生愧知己，定盟當日是同庚。

金史卷一百一十五  
卷二  
贈詩珍重知君意貧病年來類長卿

期陳淳不至

美人期不至寂寞繞階行  
短架閒書帙幽窓聽履聲  
空令開竹徑深負洗茶鐺  
春草暮雲合梅花初月明  
蹉跎殘諾在次第小詩成  
未敢輕知己終然媿後生  
新年池上夢舊雨酒邊情  
眼底非無客相看意獨傾

春寒

十日春寒擁毳袍  
簾幃漠漠與風鏹  
踈籬雪伴如相待

落月梅魂大費招寂寞燈宵猶病在蹉跎花信轉陰驕  
芳情兀兀惟憑醉却是愁多酒易消

詠次明

風神凝遠玉無瑕十載論交似飲茶深靜不教窺喜慍  
寬閒能自應紛華寄情時有撈捕樂博物咸推鑒賞家  
猶自一經淹舉子年年隨伴踏槐花

詠孔周

圍坐清談麈尾長墨痕狼藉練袞香水亭紈扇歌楊柳

春院琵琶醉海棠王謝風流才子弟齊梁煙月錦篇章  
豪華豈是泥沙物好在揮毫白玉堂

詠寅之

十年昂首抗風塵未信儒冠解誤身行比曾參還負謗  
文師韓子力排陳雞羣落落孤栖鶴瑞世翹翹一角麟  
莫恠操竿經歲困賞音須屬當家人

詠麗文

蕭散平生一布裘紙窓竹榻自夷猶常貧總坐能詩累

績學曾為應舉謀  
方外老僧邀結夏  
山中啼鳥伴吟秋  
病妻稚子從侵迫  
眉上元來不着愁

詠叔英

白襴憔悴走埃塵  
曾有聲名動縉紳  
零落田園多故後  
淹留場屋過時人  
羣居學道能違俗  
半世收書不諱貧  
怪是偏多巖壑意  
自家生長太湖濱

詠嗣業

楚楚瑤枝出謝庭  
紫芝眉宇玉生稜  
茶經陸羽曾傳訣

書品陽冰已入能閒洗碧桐留野客醉圍紅袖狎山僧  
相思不到西軒下想見清香對榻凝

寫閒舟圖寄葛汝敬

小舟依渡不施橈正似閒人遠世囂滿筵綠陰初睡起  
坐臨流水看春潮

夏日雨後書事

瓦溜初停旭日高苔花暈碧草齊腰一番濃綠催朱夏  
昨夜新波失斷橋積雨情懷渾欲病乍暄衣着最難調



西齋睡起都無事時有幽禽破寂寥

次韻吳德徵先生江南弄

煙霏曉色彤樓開美人倚醉臨粧臺韶華孰駐顏如玉  
鏡裏年光轉朱轂春風江岸靡蕪綠落盡閒花綺塵馥  
翠屏自度春寒曲簾箔重重燕雙宿

題沈侗齋修竹士女

開盡閒花草漫坡青春零落奈愁何詩人自惜鉛華冷  
翻出天寒翠袖歌

陳氏池亭納涼

朱雲覺天漢金烏朗炎曦方夏苦埃鬱言遵芳圃嬉息  
鞅俛南榭褰裳蔭北池微涼度鮮飈淺碧漾寒漪短藻  
翻鱗鬣閒渚集鳬鷺流目落翔泳遊心寓篇詞願言領  
幽意况復酬心知坐撫景光寂還憐車馬稀消搖極瞻  
諷旦晝不知疲疇能均涼燠無為居所移

夏夜

煩熇猷修晷延緣遲清宵落景不歛暑餘火夕自驕陳

牀弗能寐起坐陰繁條珍簟無涼思瑤紉有溫飈安得  
凌風翮萬里隨飄搖銀蟾皎皎雲幕捲寥寥仰睇河  
漢流無能挽天瓢似聞隴畝歡夏暎敷良苗既洽三農  
利奚辭一身焦所念肌骨柔不任寒暑消功業未有會  
已復朱顏凋

題忙閒圖

驅車遵長坂迴馬絕飛梁塵頭高十丈有客行趨蹌白  
雲帶松嶠仰睇鬱以蒼中有遺世人下笑流塵黃黃塵

與白雲曾不隔流水心情一以殊相去各萬里

寄陸安甫

吾友陸士龍瓌姿照瑤壁誰令厄世網老大媚泉石海濱鬱相望無由慰乖隔蕭然點筆餘千里盈一尺飛泉落寒空細路緣絕壁如聞犬吠聲不見人行迹白雲縹緲際應有神仙宅閭風吹瑤華知君有遐適顧君廟廊器豈久在山澤

次韻答希哲見懷兼乞草書

牆外車音寂不聞  
閒緣誰解病中紛  
涼風著意吹芳樹  
落日含情詠碧雲  
高誼乍違黃叔度  
清篇先枉沈休文  
秋來定有臨池興  
榻得鸞羣儻見分

三月廿二日家兄解事還家夜話有感

虛堂漠漠夜將分  
黯黯深愁細語真  
零落尚憐門戶在  
艱難誰似弟兄親  
掃牀重聽燈前雨  
把酒驚看夢裏人  
從此水邊松下去  
但求無事不妨貧

桃源圖

桑麻雞犬自成村  
天遣漁郎得問津  
世上神仙知不速  
桃花只待有緣人

處州劉學諭

啟

乃劉龍洲遠孫便道拜龍洲墓

於崑山作詩送之

王莽之陽荒古原  
秋草數尺封寒雲  
詩魂醉鬼渺何許  
山人尚識龍洲墳  
龍洲先生天下士  
曾以危言犯天子  
肯緣祿泰倚時人  
竟把殘骸託知己  
羸肩斗酒意翩然  
不見風流三百年  
諸孫沿牒下吳船  
到此忍不相流連

當日聲華元不改風雨荒祠儼猶在祭田修復勤故老  
仆碑重立煩賢宰旁人懷古尚勤惓况也博士諸孫賢  
源流不隔千里遠椒漿天假今朝緣精神恍惚如相授  
父老追隨為搔首誰云聲迹不相聞要識忠賢須有後  
宦途南北不終留片帆又逐浙江流白雲天際渺無極  
夢魂常在玉峯頭

謝永嘉趙君澤寄蘭

草堂安得有琳瑯倚案猗蘭奕葉光千里故人勞解珮

金匱要略卷二  
一窓幽意自生香夢回涼月甌江遠思入秋風楚畹長  
漸久不聞餘列在始知身境兩相忘

小齋盆蘭一幹數花山谷所謂蕙也初秋抽數  
幹芳馥可愛因與次明道復賞而賦之

時雨祛殘暑涼颺集華軒春徂衆芳歇晚蕙抽瑤根重  
茲蘭之屬不與凡卉羣離離水蒼珮肅肅紫霞紳耿耿  
孤榻畔燕對如高人啓扉得良友列案羅清罇於焉撫  
靈植一笑滌塵煩微風南牖來濃馥散氤氲有時參鼻



觀即之已無存譬彼孤潔士可望不可親如何庭階近  
有此幽谷芬相忘餘列中漸久不復聞魯哲日已遠楚  
繫亦沈淪無能被雅操且復酬芳魂

丹陽道中次王直夫韻

句曲東來草樹秋車音隔隴思悠悠西風黃土污人面  
落日青山觸馬頭息影道傍分茂蔭濯纓橋下得清流  
平生笑殺朱翁子辛苦剛酬妾婦羞

金陵詠懷

鍾山日上紫煙收金闕參差萬丸流帝業千年浮王氣  
都城百雉隱高秋聲華誰覓烏衣巷形勝空吟白鷺洲  
回首壯遊心未已西風策馬看吳鉤

秋日過竹堂

愛此蕭條遠市聲山門端不厭頻登破除塵夢來看竹  
糝點閒情坐有僧雨後秋光分短菊樽前風味擘新橙  
興懷先哲經游地欲繼高蹤愧未能

元日飲王漢章小樓

元日高樓小合併物華無語歲年更一樽對面貧親戚  
四袞臨頭老弟兄戀臘餘寒風漠漠入春生意雨盈盈  
向來日月尋常過誰有消埃荅太平

題廬山圖

余為林師寫丘壑高間用謝幼輿事也而石  
田丈以廬山高賦之輒亦賦此

壯哉廬山天下奇瀑流千丈江瀾瀾何人巨筆寫奇秀  
歐公昔贈劉君詞蒐玄挾恠轢萬象萬古直與山爭馳

莆田先生山澤姿壯節五老同崔嵬名通仕版偶服吏  
癖在泉石終難醫高堂束絹風披披令我掃筆為歎崎  
飛橋細路緣翠壁偃松絕壑臨蒼坻已擬先生謝幼輿  
故著逸士泉之湄就中有理未可說却被石翁加品題  
惟翁自有王維筆謂我解畫歐公詩由來絕倡不可和  
況此粉墨那容追祗應披霧見突兀此峻拔如吾師  
吾師真是劉凝之我視六一無能為凝之不作六一遠  
此詩此畫誰當知

松雪花鳥圖

踈篁顫葉風回枯老枝點玉梅花初韶華暗度人未識  
幽鳥得氣鳴相呼鳥呼花舞春舒舒髣髴生意當庭除  
青紅歷亂粉墨渝坐久始覺開珍圖印文依稀大雅字  
知是王孫吮筆餘王孫玉雪天人如寫生不數江南徐  
高齋日暮松雪暗野亭何處鷗波虛百年手跡誰與辨  
一笑且看行間書

題畫

新霜點筆意蕭蕭不盡秋光鴈影遙  
雙鳥欲浮天拍水  
夕陽人在虎山橋

對雨

獨吟池上雨拍拍水平堤暝色千峰合  
涼聲萬葉齊  
翠承深竹重寒壓晚簷低  
怪得經過斷街頭一尺泥

十月

塵凝四壁漠然空  
十月江南見朔風  
細雨挾寒催木葉  
弱雲將暝暗房櫳  
壯心迂拙懷時事  
病骨蕭條感歲功

忍死不妨留筆硯儘堪相慰寂寥中

齋前小山穢翳久矣家兄召工治之剪薙一新  
殊覺秀爽晚晴獨坐誦王臨川掃石出古色  
洗松納空光之句因以為韻賦小詩十首

急澍滌囂埃方墀淨於掃寒煙忽依樹窓中見蒼島日  
暮無來人長歌薙芳草

道人淡無營坐撫松下石埋盆作小池便有江湖適微  
風一以搖波光亂寒碧

小山蔓蒼蘿經時失青翠秋風忽披屏姿態還秀出層  
峯上崇垣徘徊見西日

清風自何來離離灑芳樹齋居不知晏但見秋滿戶欲  
詠已忘言悠然付千古

疊石不及尋空稜勢無極客至兩忘言相對餐秀色簷  
鳥窺人閒人起鳥下食

寒日滿空庭端房戶初啟怪石吁可拜修梧淨於洗幽  
賞孰知音擬喚南宮米



百卉凌秋瘁堅盟憐穉松誰令失真性屈曲難鬢鬆終  
然天矯在寒月走蒼龍

幽人如有得獨坐倚朱閣巖岫窅以閒松風互相答此  
樂須自知叩門應不納

堦前一弓地踈翠陰藂藂有時微風發一洗塵慮空會  
心非在遠悠然水竹中

西日在屋角落影搖窓光撫時懷美人還陟墻下岡風  
吹白雲去萬里遙相望

雞鳴山金陵勝處往歲蓋屢游之未有作也偶

閱九達憑虛閣記追賦

金陵佳麗石頭城傑閣登臨正雨晴帝業稱雄維虎踞  
游人選勝得雞鳴長江天際孤帆滅落日煙中萬瓦明  
滿目廢興題不得獨看名畫繞廊行


題畫

百丈蒼山倚暮寒仙源無路欲通難晚來過雨添飛瀑  
只好幽人隔岸看

天外青山半有無  
江流萬里月明孤  
夜深偶感曹瞞迹  
却被傍人作畫圖

題畫送錢德夫南還

匆匆歲暮束書還  
樽酒淋漓悵別間  
明日西齋檢行迹  
暮雲空見越南山



甫田集卷二

欽定四庫全書

集部

甫田集卷三至六

詳校官給事中臣王鍾健

中書<sub>臣</sub>劉源溥覆勘

總校官檢討臣何思鈞

校對官學正臣湯垣

謄錄監生臣董邦本

欽定四庫全書

甫田集卷三

明文徵明撰

詩五十七首

元日試筆

晨光鵲鵲散祥煙  
寶歷初開第四年  
井里蕭條占歲儉  
人情薄劣與時遷  
雪殘梅圃難藏瘦  
日轉冰池欲破堅  
老大未忘惟筆硯  
小窻和醉寫新篇

金野月公集  
卷三  
人日立春

東風剪韭薦時羞  
細雨江梅破晚愁  
眼底日辰剛數七  
夢中春色又從頭  
誰修故事裁金勝  
恰有殘寒送土牛  
珍重道衡今不作  
花前詩思總悠悠

懷次明

高居寂歷鴈村前  
中有幽人抱枕眠  
見說常貧妨道味  
從教小病養閒緣  
三旬閉戶桃花雨  
一味安心栢子煙  
安得板除將艇子  
橫塘新水綠娟娟

春曉曲

翠塵沃日煙霏霏彤光飛上千果愚誰家高樓鎖春色  
金鋪約戶蟠雙螭東風掠幌驚綃動瑤島蘭溫睡初重  
起來臨鏡悄無言含情自理雙鶯夢夢回生怕守宮殘  
捲袖移鞦獨自看燕子啣春欲飛去海棠猶自勒輕寒  
簾幕垂寒朝不捲綺疏結香春較淺欲裁羅段作春衫  
自藝薰鑪熨金剪

春夜曲



香雲貫月溶金波碧煙暈樹春婆娑海珠泣紅花露重  
蜃脂流絳蘭逶迤越羅襖幙交流蘇繡襦結帶明青蛾  
金壺轉刻銅龍濕漏水濺濺轆轤漚漚轆轤沉沉軋銀井  
畫轂難淹夜愁永起看青漢不成眠不見雙星見河影  
河明月淡斗橫斜通宵春思匝天涯眉端心事說不得  
自調新譜按琵琶

庭中海棠為風雨所敗

病起傷春試倚欄名花經雨已摧殘等閒一片愁飛却

滿地腥紅更忍看

崇朝妬雨損花枝更著狂風徹夜吹  
莫自怨他風雨惡  
靚粧能有幾多時

獨坐

獨坐茆簷靜澄懷道味長年光付書卷  
幽事續鑪香日  
出烏烏樂雨收花竹涼蕭閒習成懶  
不是寡迎將

梨花

剪水凝霜妬蝶裊曲闌風味玉清溫  
粉痕浥露春含淚

夜色籠煙月斷魂十里香雲迷短夢誰家細雨鎖重門  
洗粧見說清明近旋典春衣置酒樽

錢氏西齋粉紅桃花

溫情膩質可憐生浥浥輕韶入粉勻新暖透肌紅沁玉  
晚風吹酒淡生春窺牆有態如含笑對面無言故惱人  
莫作尋常輕薄看楊家姊妹是前身

春興

青陽轉芳序淑景麗清嘉晨風扇微和百鳥鳴周遮繁

陰沍清露朱英耀朝華端居媿物化起擷崇蘭葩貞芬  
媚幽獨常恐委泥沙青青陌上草日夕遍天涯

妍英弄芳意柳色含春姿物華浩無涯  
馳蕩東風吹東風日以熙草色日以滋  
青春萬里道遊子有所思浮雲漏白白  
宿露朝已晞攀條惜婉麗忽得瑛瓊枝  
芳悰未有托暮景已西馳菁華難復恃  
結藹聊自怡

東禪寺

古寺幽深帶碧川坐來清晝永於年  
虛堂市遠人聲斷

小砌風微樹影圓  
筆硯更償閒裏債  
茗薰聊結靜中緣

落花啼鳥春如許  
却誦新詩憶遇賢

遇賢宋神僧嘗住東禪有詩云門前

綠樹無啼鳥庭下蒼苔有落花聊與東風論箇事十分春色屬誰家

詩人孫太初過訪

把鋤南來賦遠遊  
又看東上浙江舟  
山齋動是經時別  
菜飯聊堪半日留  
醉裏江湖真有味  
春來花鳥正關愁  
天台鴈宕平生夢  
憑仗詩囊次第收

暮春雨後陳以鈞邀游石湖遂登治平

貪看粼粼水拍堤扁舟忽在跨塘西  
千山雨過青猶滴  
四月尋春綠已齊湖上未忘經歲約  
竹間覓得舊時題  
晚煙十里歸城路不是桃源也自迷

題畫

東風吹春著幽谷宿雨浮煙樹  
新沐斜橋曲徑帶流水  
白日疎籬蔭濃綠晴江隔世不隔山  
百疊蒼螺墮茆屋  
輸却長吟抱膝人鎮日臨磯弄晴淥

千巖拔地排青蒼古松謾謾連重岡  
岡迴嶺複得奇絕

金史四庫全書  
卷三  
瀑流千丈垂銀潢盤盤細路入雲長兩涯對起懸飛梁  
雲重路僻不知處應有仙家在深塢夕陽變滅晚山寒  
無限風煙屬倚闌

與宜興吳祖貽夜話有作就簡李宗淵杭道卿

吳克學

有客扁舟自陽羨夜堂風雨對高眠不辭談笑成佳會  
祇覺淹留有宿緣別後交遊如夢裏意中山水路樽前  
青燈酒醒還生戀明日煙波更渺然

春日

茆屋泥香燕子飛  
東風日暖谷鶯啼  
遊人漫自穿花柳  
別有春光在竹西

金陵秋夜與彭寅之湯子重步月

雙闕深沉夜向闌  
碧天露下葛衣單  
風吹急柝嚴城閉  
月照行人古道寒  
往事悠悠歌鳳去  
青山靡靡識龍蟠  
壯懷萬里同遊在  
滿目風煙引劍看

題黃應龍所藏巨然廬山圖



筠陽文學倦官職十年歸來四壁立探囊大笑得片紙  
不啻瓊球加拾襲攜來示我俾品評謂是名僧巨然筆  
渙跡瀉踪那辨真行間雙印還堪識古篆依稀贛州字  
先宋流傳非一日要知源委出珍藏未論誰何定名跡  
墨渝紙敝神自存老筆嶙皴况超逸岡巒迤邐蒙密樹  
浦淑紫紆帶村室盤盤細路繞山椒斜引魚梁更東出  
途窮山盡得幽居穹宮傑構臨清渠仙邪佛邪定何處  
髣髴勝境如匡廬還從文學問何如大笑謂我言非虛

自言遠遊真不俗曾見廬山真面目五老之峯披白袍  
玉虹萬丈時飛瀑某丘某壑皆舊游展卷晴窓眼猶熟  
祇今老倦到無由對此時時作卧遊慚余裹足不出戶  
聞君此語心悠悠高懷只尺已千里眼中殊覺欠扁舟  
書吾尹扇

溪頭古樹靜垂陰溪水盈盈不受塵五月江南新雨歇  
晚風多少納涼人

雨洗鉛華一夕空枝頭青子却收功傍人不識天工巧

猶戀飛花怨晚風

道復西齋古石

玲瓏蒼壁太湖姿  
浪蝕沙淘面面奇  
百穴晴窻通玉女  
一拳小石夢仇池  
乍逢合下南宮拜  
欲詠還輸白傅詞  
便擬高齋題列岫  
朝來秀色滿檐帷

吾尹邀遊虎丘奉次席間聯句

使君置酒贊公房  
飛蓋追隨草木光  
選勝不辭蕭寺遠  
為閒翻遣老僧忙  
千村霽雪人憑閣  
一塢碧雲山墮牆

斜日離離賓客亂好修故事續歐陽

同子重晚步過竹堂

河豚東來得斷垣一龕清楚托旃檀蒼苔繞徑無塵到  
落日敲門借竹看風急簾光先送暝春陰梅韻獨禁寒  
鑪香深寂蒲團淨欲就山僧結淡歡

暮春遊石湖

郭外南湖一鏡開吳宮煙草暗荒臺道人不與興亡事  
只記溪名是越來

過眼諸峯應接忙  
新晴草樹繞湖香  
不知參政移家後

若個重來問海棠

范石湖每歲攜家汎湖賞海棠

茶磨楞伽次第經  
淡煙消處五湖明  
一樽斜日湖亭上  
閒看西山弄晚晴

夏意

五月江南櫻筍殘  
疎花吹盡綠漫漫  
雨來恰及梅黃候  
春去猶餘麥秀寒  
白日幽深茆屋靜  
野情蕭散芡袍寬  
美人何處經時別  
滿耳新蟬獨倚闌

五月十三日種竹

分得亭亭綠玉枝  
雨餘生意滿堦除  
凌梢已展疎疎葉  
護粉聊營短短籬  
肯信移來真是醉  
不愁俗在未能醫  
人間此夜頻前席  
涼月虛窻更自宜

早起

殘更斷續天蒼蒼  
開門汲井夜欲央  
鷄聲人語杳無際  
落月曙色相為光  
臨風短髮不受握  
泣露碧葉微生涼  
屋頭日出萬事集  
惜取靜境聊徜徉

孔周經時不見目想高勝居然在懷寫碧梧高  
士圖并小詩寄意

漠漠疎桐灑面涼  
濺濺寒玉漱廻塘  
馬蹄不到清陰寂  
始覺空山白日長

夜坐

溽暑夜不寐涼風初解圍  
起看星漢動坐久語音稀  
殘月耿猶在流螢忽自飛  
一聲何處鶴露下欲沾衣

九日汎石湖

煙歛吳山翠擁螺重陽晴暖似春和閒情已付青油舫  
斜日輕搖綠玉波橋外連錢游騎屬水邊紈扇麗人過  
黃花何處酬佳節白鳥滄洲引興多

余為黃應龍先生作小畫久而未詩黃既自題  
其端復徵拙作漫賦數語畫作於弘治丙辰  
詎今正德辛未十有六年矣

尺楮回看十六年殘丹剝粉故依然得君品裁知增重  
顧我聰明不及前小艇沿流吟落日碧山浮玉漲晴煙



詩中真境何容贅聊續當年未了緣

十月五日出城暮歸門闔留宿南濠王氏樓與

履約昆仲夜話有作

永濟橋南水閣斜夜深投宿靜無譁淹留短榻行邊約  
只尺孤城夢裏家碧樹報風吟細葉青燈閃雨落寒花  
玄言寂寞都無寐消得清腴一味茶

同次明九遠及王氏兄弟汎舟游橫山

蘭橈十里下橫塘漠漠風撩髻影涼野水秋來寒玉淨

碧山西去暮雲長行邊黃偃禾  
栖畝眼底紅酣樹飽霜  
飛盡落霞新月上空江渺渺  
白蘋香

題畫

隔浦羣山百疊秋青煙漠漠  
望中收松搖落日黃金碎  
江浸長空碧玉流水閣虛明  
占勝槩野情蕭散在滄洲  
人間佳境非難覓自是塵緣  
不易投

題國用汗漫游卷

江湖蹤跡自年年  
去住隨緣興浩然  
三月鶯花燕市酒

一牀書畫米家船留連勝事登山屐狼藉春風買笑錢  
回首馬遷今不作為君重賦遠遊篇

不寐

展枕不得寐沉沉玉漏淹一燈寒照壁半夜雨鳴簷有  
味留貧在多愁與病兼髻邊新白髮應為小詩添

新寒

木落見清真端居物自春窻虛蠅擊紙院靜鳥窺人白  
日經簷短青衫卒歲貧新寒滿城郭欲出畏風塵

登樓

萬里新寒襲敝裘故人何在獨登樓江山搖落愁無際  
鴻鵠哀鳴去有求北首長安雲日暮西風淮海戍塵秋  
誰懷杞國千年慮目繞碧天空自流

次韻孫太初秋夜汎月之作

煙歛依依樹鷗飛漠漠田短簫吹夜月高興落江天遠  
火搖輕浪跳魚驚過船良辰不易得吾敢卜明年

冬日楊儀部宅讌集會者朱性甫朱堯民祝希

哲邢麗文陳道復及余六人分韻得酒字

徂冬肅玄陰涼飈集虛牖璫霏邁時晴朝旭射簷溜欣  
言對羣英況我平生友結交廿年更復此同樽酒羽觴  
激清絲蘭羞粲朱豆豈無高讌會重此文史舊茲焉申  
故好歲晏期勿負

歲暮雪晴山齋肆目偶閱謝臯羽詩窮冬疑有  
雨一雪却成晴喜其精妙因衍為韻賦小詩十  
章

歲晏羣芳息枯條鳴北風層陰結黯黯朔雪飛長空元  
冥肅景象物化歸終窮妍華肇伊始冉冉收春功  
積雪縞晴晝離離見高松睠茲歲寒枝不復知春冬旭  
光時明滅奄忽浮雲蹤塵心不能戢歲晏徒忡忡  
朝光射晴綺飛翼炫瑤姿微風吹竹葉文玉粉差差霜  
草行已繁冰谷流寒漸玄機抱終始逝矣夫何疑  
夜寒拂衾裯曉色明窓牖有客從叩門稚子方擁帚玉  
梅已數英寒香在纖手一樽疇與同自入無何有

空庭集饑鳥景色入寒冱濃陰釀朔雪松石積縞素玉  
顏不堅好日出四簷雨薄晚北風微幽人啓朱戶

朔吹號枯藤日暮殊未息居人事塞向鷺鳥厲高翼不  
知夜來雪庭戶皓已積來麴端可期三白已兆一

陽卉不復腓研沼冰初結雲日弄寒姿晶光互明滅雙  
扉風自揜陋巷人迹絕庭鳥忽自飛蒼松落殘雪

初旭射茆簷枯叢戀寒雀睡起無餘聲風簷時自約展  
冊娛道言樽酒獨斟酌無人不妨閒客至亦不却

擁寒不出戶焚香娛燕清朝日照盂盎浮光上虛楹修  
竹不受風時時蒼玉鳴閒情溢眉宇酒醒詩亦成  
殘雪不蔽瓦斷溜收寒聲晨威淒以嚴雲日麗新晴凌  
風振叢薄枯卉不復榮年光屬歸歛慘淡有餘情

虎丘劍池相傳深不可測舊志載秦皇發闔閭

墓鑿山求劍其鑿處遂成深澗王禹偁作劍  
池銘嘗辨其非正德辛未冬水涸池空得石  
闕中空不知其際余往觀之賦詩貽同游者



和而傳焉

吳王埋玉幾千年水落池空得墓磚地下誰曾求寶劍  
眼中吾已見桑田金鳧寂寞隨塵劫石闕分明有洞天  
安得元之論往事滿山寒日散蒼煙

除夕

歡悰入病垂垂減素髮侵愁冉冉加誰有聲名垂宇宙  
自憐零落負年華東風綠帖裁春草殘雪青燈剪夜花  
惜取一樽酬見在中原戎馬暗驚沙



甫田集卷三